



Alo, alo... Sa čime se sve suočavaju pripadnici SIPA

Krimolovcima građani prijavljuju i vanzemaljce!



NASLUŠAJU SE SVEGA Zovu ih i psihički bolesnici

SARAJEVO - Posao krimolovaca, odnosno policijskih službenika SIPA, koji su u svakodnevnoj interakciji i na usluzi građanima u BiH, nije nimalo lak. Iako žele profesionalno raditi svoj posao i do maksimuma iskoristiti svaku informaciju koja im se nudi, često ih različite prijave nasmiju ili pak ostave u čudu.

Naime, oni su ljudi koji sjede s druge strane telefonske žice, a posao im je da primaju i evidentiraju sve pozive koji im stignu, sa ciljem prevencije ili kažnjavanja krivičnih djela. No, krimolovci u velikoj mjeri imaju savjetodavnu, pa čak i prijateljsku ulogu.

U to se uvjerila ekipa portala "Klix.ba" prilikom posjete krimolovcima u sjedištu SIPA.

U razgovoru s Nebojšom Pušarem, šefom Odsjeka za kriminalističko-obavještajne poslove, i Sadmirom Karavdićem, dugogodišnjim vodom tima krimolovaca, saznali smo s koliko strpljenja i poštovanosti moraju raditi ovi ljudi.

Naime, na ovršliniju, koja je anonimna i besplatna, mjesečno stiže nekoliko stotina različitih poziva iz cijele zemlje, a krimolovcima se daju informacije najrazličitijeg karaktera.

Tako mogli žele prijaviti različita krivična djela, kao što su zloupotreba položaja ili narkotika ili pak nezakonito

posjedovanje oružja. Drugi žele savjet o tome kako da riješe problem. Treći žele napakostiti onima s kojima su u svađi.

Kako su nam ispričali naši sagovornici, dobro se sjećaju slučaja u kojem je krimolovce nazvala jedna gospođa iz malog gradića i ispričala im kako ima strašnih problema sa svojim sinom.

- Pričala nam je kako ima problema sa sinom koji je osmi razred, kako je ne sluša, dolazi kasno kući, ima

Supružnici često zovu nakon razvoda i prijavljuju onog drugog za krivična djela

neopravdanih časova... Saslušao sam je misleći da tu ima krivičnog djela, ali je ona tražila od nas da dođemo da mu malo zaprijetimo. Govorila nam je da bi on tada bio bolji, jer ona ne može s njim izaći na kraj - kazao je Karavdić.

Često krimolovce zovu i djeca koja žele da razgovaraju s njima, a gotovo po pravilu ih zanima kako zapravo rade svoj posao i da li imaju pištolj.

Kako je istakao Pušar, krimolovci često mogu predosjetiti promjenu vremena, ali ne po prognozi, nego po vrsti poziva koje primaju.

- Zovu nas psihički bole-

snici koji uporno tvrde da ih neko prati, da su u njihovoj blizini postavljene nelegalne stanice uz pomoć kojih iz prate iz svemira - priča Pušar.

Zabilježili su i prijavu četrdesetdvogodišnjaka koji je došao na portirnicu SIPA, a koji je tvrdio da razgovara s vanzemalcima, da žele da mu naude i došao je da to prijavi.

Osim ovih prijava, često se međuljudski sukobi lome na telefonu krimolovaca. Zaprimaju pozive ljutih supružnika nakon razvoda.

- Supružnici zovu nakon sukoba ili razvoda i prijavljuju onog drugog za najteža krivična djela. Većinom zovu žene koje prijavljuju da su im muževi protagonisti najvećih krivičnih djela, kao što je trgovina drogom ili nelegalno držanje oružja - priča Karavdić.

Kada je riječ o ozbiljnim prijavama koje zaprimaju krimolovci, struktura polazi od onih za nelegalnu sječu šume do provalnih krađa. Ipak, najveći broj prijavljenih djela uglavnom se odnosi na zloupotrebu službenog položaja.

- U prošloj godini po ovom osnovu zaprimljeno je 145 prijava. Neke od njih su veoma ozbiljne i odnose se na ljude koji su na veoma važnim funkcijama u našoj zemlji. Neke su rezultirale izvještajima o krivičnim djelima, a neke nisu - kazao je Karavdić. **Ag.**